

四庫全書

子部

欽定四庫全書

子部

御纂醫宗金鑑卷四十二

詳校官太醫院醫士臣程泰

編修臣倉聖脈覆勘

總校官中書臣朱鈐

校對官監丞臣張曾炳

謄錄監生臣胡明楷

欽定四庫全書

御纂醫宗金鑑卷四十二

編輯雜病心法要訣目錄

瘧疾

霍亂

嘔吐噦

翻胃噎膈

泄瀉

痢疾

黃疸

積聚

疝

御纂醫宗金鑑卷四十二目錄

欽定四庫全書

御纂醫宗金鑑卷四十二

編輯雜病心法要訣

瘧疾總括

夏傷於暑舍榮內秋感寒風并衛居此時或爲外邪束
暑汗無出病瘧疾

註經曰瘧瘧皆生於風謂四時病瘧未有不因風寒

外束暑邪內伏者也又曰瘧者風寒之氣不常也

此言比時病瘧者也又曰夏傷於暑秋爲瘧瘧又
曰夏暑汗不出者秋成風瘧謂夏傷於暑其邪甚
者即病暑其邪微者則舍於榮復感秋氣寒風與
衛并居則暑與風寒合邪始成瘧病也其不即病
傷寒者亦以有暑邪預伏於榮中也蓋有風無暑
惟病風有暑無風惟病暑必風暑合邪始病瘧也
日作間作

瘧隨經絡循伏膂深入脊內注伏衝橫連膜原薄藏府

會衛之時正邪爭得陰內薄生寒慄得陽外出熱蒸蒸邪淺日作日會衛邪深間作衛遲逢

注

瘧氣之邪伏藏於榮隨其經絡循脊膂之表而下此初病邪淺傳舍之次也其邪深者則入脊膂之內伏注於衝脈橫連諸經脂膜之原內及藏府此邪漸深傳舍之次也衛氣者一日一夜周於身每至明日則出足太陽精明大會於風府腠理乃開開則所客榮衛之邪入邪入得陰內薄則生寒得

陽外出則生熱內外相薄邪正交爭而病乃作也
病初邪淺者衛行未失常度其邪日與衛會故日
作也病久邪深者衛行遲失常度其邪不能日與
衛會故間日乃作也時有間二日間三日或至數
日作者亦衛氣行愈遲會愈遲故作愈遲也

瘧晝夜作

衛不循經行脈外陽會晝發陰夜發邪退自然歸陽分
病進每必入陰家

註
榮氣循經而行脈中衛氣不循經而行脈外惟日
行於三陽夜行於三陰故邪在三陽之淺者則晝
發邪在三陰之深者則夜發病邪將退者夜發退
爲晝發此爲去陰就陽則病欲已也病邪漸進者
晝發退爲夜發此爲去陽入陰則病益甚也

瘧蚤晏作

衛氣平旦會風府邪傳日下一節間從頭循下故益晏
下極復上蚤之緣

註衛氣流行每日平旦會於風府而邪氣中人從頭
項歷風府下循背腰日下傳脊之一節邪與衛會
日晚故作日益晏也邪傳下極氐衝其氣復上行
邪與衛會日蚤故作日益蚤也

瘧疾治法

瘧初氣實汗吐下表裏俱清用解方清解不愈方可截
久瘧形虛補自當

註瘧初氣實均宜汗吐下有表裏證汗下之胸滿嘔

逆有飲者吐之表裏俱清宜用和解清解不愈表裏無證可用截藥止之久瘧形羸氣虛宜用補劑自當然也

桂麻各半湯

瘧初寒熱兩平者桂麻各半汗方療汗少寒多麻倍入汗多倍桂熱加膏

註瘧病初起寒熱不多不少兩平者宜桂麻各半湯汗之汗少寒多熱少者倍麻黃湯汗之汗多寒少

熱平者倍桂枝湯汗之熱多者更加石膏

麻黃羌活湯

桂枝羌活湯

麻黃羌活加半夏湯

白虎湯

白虎桂枝湯

柴胡白虎湯

柴胡桂枝湯

寒多寒瘧而無汗麻黃羌活草防尋熱多有汗爲風瘧
減麻添桂嘔半均先熱後寒名溫瘧白虎汗多合桂君
瘧瘧但熱柴白虎牝瘧惟寒柴桂親

註

此皆諸瘧初起之汗法也先傷於寒後傷於風先
寒後熱寒多熱少無汗謂之寒瘧宜用麻黃羌活
湯即麻黃羌活防風甘草也先傷於寒後傷於風
先寒後熱熱多寒少有汗謂之風瘧宜用桂枝羌
活湯即桂枝羌活防風甘草也二證嘔者均加半

夏先傷於風後傷於寒先熱後寒謂之溫瘧宜用
白虎湯汗多合桂枝湯陽氣盛陽獨發則但熱而
不寒謂之痺瘧宜用柴胡白虎湯即小柴胡合白
虎湯也陰氣盛陰獨發則但寒而不熱謂之牝瘧
宜用柴胡桂枝湯即小柴胡合桂枝湯也

草果柴平湯

大柴胡湯

食瘧痞悶噫惡食草果小柴平胃宜瘧裏便鞭大柴下

消檳果朴量加之

註

因食而病瘧者則痞悶噫氣惡食宜小柴胡合平
胃散加草果清之凡瘧有裏不清便鞭者宜大柴
胡湯加芒消厚朴草果檳榔下之

清脾飲

瘧疾已經汗吐下清解未盡寒熱方清脾白朮青朴果
小柴參去入苓薑氣虛加參痰橘半飲多宜逐倍薑榔
渴熱知膏天花粉食滯麥麩濕澤蒼

註 瘧疾已經或汗或吐或下表裏無證法當清解宜

用清脾飲和之即白朮青皮厚朴草果柴胡黃芩

半夏甘草茯苓生薑也氣虛者加人參痰多者加

橘紅倍半夏飲多者倍生薑加檳榔渴熱者加知

母石膏天花粉食滯者加麥芽神麴濕盛者加澤

瀉蒼朮

久瘧虛瘧勞瘧

久瘧氣虛脾胃弱四獸益氣等湯斟勞瘧鱉甲十全補

熱除者桂入柴苓

註久患瘧疾形氣俱虛脾胃弱不思食宜用四獸飲
補中益氣等湯斟酌治之久病勞損氣血兩虛而
病瘧疾者名曰勞瘧宜用十全大補湯倍加鱉魚甲
熱盛者除去黃耆肉桂加柴胡黃芩也

柴胡截瘧飲

蜜佗僧散

諸瘧發過三五次表裏皆清截法先未清截蚤發不已

已清不截正衰難截虛柴胡截瘧飲小柴梅桃檳常山
截實不二佗僧散燒酒冷調服面南

註凡瘧按法治之發過三五次表裏無證當先以截
瘧藥截之若表裏未清截蚤則瘧疾必復發之不
已表裏已清不截則正衰邪盛而難治也截不足
人之瘧宜用小柴胡湯加常山檳榔烏梅桃仁薑
棗煎併滓露一宿次日發前一二時小溫服惡心
以糖拌烏梅肉壓之截有餘人之瘧宜用不二飲

全方或蜜佗僧細末大人七分小兒量之冷燒酒
調面南如前法服之一服不愈再服必止戒鷄魚
豆腐麵食羹湯熱粥熱物

痰瘧瘧母

痰瘧經年久不愈瘧母成塊結癖癥形實控涎或化滯
攻後餘法與前同

註痰瘧經年不愈之老瘧也瘧母久瘧腹中成塊癖

也形實宜用控涎丹以攻痰飲或用化滯丸以攻

積滯攻後之餘法與前所治瘧法同也

桂枝麻黃柴胡四物去杏仁加桃仁湯

瘧在夜發三陰瘧桂麻柴物杏易桃鬼瘧尸注多惡夢
恐怖蘇合效功高

註瘧在夜發名曰三陰瘧疾初熱宜用桂枝湯麻黃
湯小柴胡湯四物湯方合劑以杏仁易桃仁增損
汗之汗解之後餘同前法鬼瘧亦多在夜發由尸
氣注之比三陰瘧疾則夜多惡夢時生恐怖宜用

蘇合香丸治之



霍亂總括

揮霍變亂生倉卒心腹大痛吐利兼吐瀉不出乾霍亂
舌卷筋縮入腹難

註欲吐不吐欲瀉不瀉心腹大痛名曰乾霍亂又名

攪腸痧若舌卷筋縮則卵陰入腹難治也

藿香正氣散

二香湯

甘露飲

霍亂風寒暑食水雜邪爲病正氣方藿蘇陳半夏苓草
芷桔腹皮厚朴當轉筋木瓜吳萸入暑合香薷濕入蒼
暑熱六一甘露飲寒極烏附理中湯

註

霍亂之病得之於風寒暑食水邪雜揉爲病亂於
腸胃清濁相干故心腹大痛吐瀉也藿香正氣湯
即藿香蘇葉陳皮半夏茯苓甘草白芷桔梗大腹
皮厚朴也暑則吐多合香薷飲名二香湯濕則瀉
多加蒼朮暑熱甚者用辰砂六一散或五苓散加

石膏滑石寒水石名甘露飲寒極肢厥脈伏者用
炮川烏炮川附合理中湯

--	--	--	--	--	--	--	--	--

噎膈翻胃總括

三陽熱結傷津液乾枯賁幽魄不通賁門不納爲噎膈
幽門不放翻胃成二證留連傳導隘魄門應自濇於行
胸痛便鞭如羊糞吐沫嘔血命難生

註 三陽熱結謂胃小腸大腸三府熱結不散灼傷津
液也胃之上口爲賁門小腸之上口爲幽門大腸
之下口爲魄門三府津液既傷三門自然乾枯而
水穀出入之道不得流通矣賁門乾枯則納入水

穀之道路狹隘故食不能下爲噎塞也幽門乾枯則放出腐化之道路狹隘故食入反出爲翻胃也二證留連日久則大腸傳道之路狹隘故魄門自應燥瀆難行也胸痛如刺胃腕傷也便如羊糞津液枯也吐沫嘔血血液不行皆死證也

人參利膈丸

承硫散

五汁大黃清燥熱丁沉君子理虛寒便秘壅遏應利膈

吐逆不止汞硫先利膈小承參草木歸藿檳榔麻蜜丸
汞一硫二研如墨老酒薑汁服即安

註

五汁謂五汁飲以清燥乾也大黃謂大黃湯即大
黃一味用薑汁炙大黃片變黑黃色量人強弱每
服二三錢加陳倉米一撮葱白二莖煎去滓服以
治熱結也丁香沉香加入四君子六君子理中湯
內治虛寒也利膈謂利膈丸即枳殼厚朴大黃人
參甘草木香當歸藿香檳榔桃仁火麻仁蜜爲丸

也汞硫謂汞硫散也

四君子湯

四物湯

二陳湯

二十四味流氣飲

氣少血枯四君子物痰多氣滯二陳流餘者亦同嘔吐法
竭思區畫待天休

註
氣少者宜四君子湯血枯者宜四物湯痰多宜二

陳湯氣滯者宜二十四味流氣飲其餘之治法同
嘔吐此病雖竭心思區畫亦不過盡人事以待天
命也

嘔吐噦總括

有物有聲謂之嘔有物無聲吐之徵無物有聲噦乾嘔
面青指黑痛厥凶

註
面色青指甲黑也中痛不止肢厥不回其凶可知
也

小半夏湯

橘皮半夏湯

大半夏湯

金匱要略卷之四十一
卷四十一
黃連半夏湯

丁萸六均湯

嘔吐半夏爲聖藥氣盛加橘虛蜜參熱盛薑連便閉下
寒盛丁萸薑六君

註
便閉謂大小二便閉而不行宜攻下也初吐切不可下恐逆病勢也

五汁飲

硫汞散

化滯丸

潤燥止吐五汁飲蘆薈薺甘蔗竹瀝薑嘔吐不下硫汞墜積痛作吐化滯良

註

五汁飲即蘆薈薺甘蔗竹瀝薑汁也嘔吐諸藥湯水到咽即吐者宜用重墜之藥以石硫黃二錢水銀一錢同研如煤色極細用老酒薑汁調服稍點白滾湯亦可頓服之其藥即不能吐出次日大便出黑色穢物諸湯水藥服之則不吐也如不大

便黑色再服以大便利爲度吐而痛者乃積也宜
化滯丸

諸泄總括

食瀉 胃瀉 飲瀉 痰瀉 火瀉 暑瀉

滑瀉 大瘕瀉

濕勝濡瀉即水瀉多水腸鳴腹不疼寒濕洞瀉即寒瀉
鴨澹清徹痛雷鳴完穀不化名殮瀉土衰木盛不升清
脾虛腹滿食後瀉腎瀉寒虛晨數行

註 濡者水也洞者直傾下也鴨澹如鴨屎之澹澄徹
清冷也痛腹痛也雷鳴腸鳴甚也不升清謂清氣

在下不上升也脾瀉脾虛也食瀉飲食後即瀉也
晨數行每至蚤晨行瀉數次也

食瀉 濡瀉 水瀉 洞瀉 飧瀉 寒瀉 脾瀉

腎瀉

傷食作瀉即胃瀉噫氣腹痛穢而黏渴飲瀉復渴飲瀉
時瀉時止却屬痰火瀉陣陣痛飲冷暑瀉面垢汗渴煩
滑瀉日久不能禁大瘕今時作痢看

註 過食作瀉名曰食瀉即胃瀉也穢而黏所瀉之物

臭而黏也渴而飲飲而瀉瀉而復渴渴而復飲飲而復瀉飲瀉也時或瀉時或不瀉屬疾瀉也陣陣謂瀉一陣痛一陣也大瘕瀉即今時之痢疾病也泄瀉死證

泄瀉形衰脈實大五虛噦逆手足寒大孔直出無禁止下瀉土噉命多難

註五虛謂脈細皮寒氣少水漿不入大便不禁也大孔謂肛門大孔不禁也

參苓白朮散

濕瀉胃苓分清濁寒瀉理中附子添飧瀉升陽益胃治
倍加芍藥減黃連脾瀉參苓白朮散扁豆四君蓮肉攢
薏苡山藥縮砂桔腎瀉二神四神丸

註 參苓白朮散即扁豆人參白朮茯苓炙草蓮肉薏
苡仁山藥縮砂桔梗也二神丸即補骨脂肉豆蔻
本方加吳茱萸五味子名四神丸

青六散

芍藥苓連葛根湯

八柱散

食瀉實下虛消導飲瀉實者神祐斟虛者春澤甘露飲
痰瀉實攻虛六君火瀉草芍苓連葛暑瀉紅麴六一勻
滑瀉八柱理中附粟殼烏梅訶菴尋

註
食瀉形氣實者宜大承化滯等藥下之形氣虛者
宜枳朮平胃等消導之神祐斟謂雖當用神祐丸
逐飲然亦斟酌不可過也春澤謂春澤湯也甘露

飲謂五苓甘露飲也芍藥苓連葛根湯即甘草芍藥黃苓黃連葛根也青六散即六一散加紅麴也八柱散附子理中湯加罌粟殼烏梅訶子肉蔻也瀉心導赤散

茯苓車前子飲

苓桂理中湯

口糜泄瀉雖云熱上下相移亦必虛心脾開竅於舌口小腸胃病化職失糜發生地通連草瀉下參苓白朮宜

尿少茯苓車前飲火虛苓桂理中醫

註

口瘡糜爛泄瀉一證古經未載以理推之雖云屬熱然其上發口糜下瀉即止泄瀉方止口糜即生觀其上下相移之情狀亦必純實熱之所爲也心之竅開於舌脾之竅開於口心脾之熱故上發口舌瘡赤糜爛胃主消化水穀小腸主盛受消化心脾之熱下移小腸胃府則運化之職失矣故下注泄瀉也口糜發時晚用瀉心導赤散滾湯淬服之

即生地木通黃連甘草梢也下泄瀉時蚤晚用參
苓白朮散糯米湯服之若小便甚少下利不止則
爲水走大腸宜用茯苓車前子二味各等分煎湯
時時代飲利水導熱若服寒涼藥口瘡不效則爲
虛火上泛宜用理中湯加肉桂大倍茯苓降陽利
水降陽而口糜自消水利泄瀉自止可並愈也

痢疾總括

大瘕小腸大腸瀉腸癖滯下古痢名外因風暑濕蒸氣
內因不謹飲食生白痢傷氣赤傷血寒虛微痛熱窘疼
實墜糞前虛墜後濕熱寒虛初久稱

註
大瘕瀉者裏急後重數至圓而不能便莖中痛也

小腸瀉者溲澁而便膿血少腹痛也大腸瀉者食
已窘迫大便色白腸鳴切痛也腸癖者飲食不節
起居不時陰受之則入五藏臍脹閉塞下爲殮瀉

久爲腸癖腹痛下血也滯下者積汁垢膩與濕熱滯於腸中因而下也此皆古痢之名也然痢之爲病裏急後重下利膿血小便赤澁裏急者腹痛積滯也後重者下墜氣滯也小便赤澁者濕熱鬱滯也皆因外受風暑濕蒸之氣內傷生冷飲食過度而生也白痢自大腸來大腸與肺爲表裏肺主氣故屬傷氣也赤痢自小腸來小腸與心爲表裏心主血故屬傷血也寒閉痛甚寒開痛微痢開病減

故痛微也。虛者少氣氣無壅滯，故亦痛微也。熱者多實性急，不得舒通，故窘痛甚也。後墜下迫肛門，糞出墜止爲糞前墜，乃滯也。故曰實墜糞出更墜，爲糞後墜，非滯也。故曰虛墜。初痢多屬濕熱，久痢多屬寒虛也。

噤口痢 水穀痢 風痢 休息痢 熱痢
寒痢 濕痢 五色痢

噤口飲食俱不納，水穀糟粕雜血膿風痢，墜重圜清血。

休息時作復時停熱痢魚腦稠黏穢寒痢稀澀白清腥
濕痢黑豆汁渾濁五色相雜藏氣凶

註 噤口痢者下利不食或嘔不能食也水穀痢者糟

粕膿血雜下也風痢者似腸風下清血而有墜痛
也休息痢者時發作時停止也五色痢者五色膿
血相雜而下也若有藏腐屍臭之氣則凶

痢疾死證

水漿不入利不止氣少脈細皮膚寒純血噤口嘔藏氣

身熱脈大命難全

註 下利不止水漿不入氣少脈細皮膚寒死於陽絕也下利純血噤口嘔逆藏氣身熱脈大死於陰絕也

倉廩湯

大黃黃連湯

初痢表熱宜倉廩裏熱衝心大黃連寒痢理中訶菴縮附白桂赤不須言

註

初痢有表證發熱者不宜攻之法當先解其外用
倉廩湯汗之裏熱盛上衝心作嘔噦口者法當先
攻其裏用大黃黃連好酒煎服攻之寒痢宜用理
中湯加訶子肉蔻縮砂白多者加附子赤多者加
肉桂也

芍藥湯

初痢內外無大熱芩連枳木芍歸榔桂草尿澁滑石倍
利數窘痛入大黃

註
初痢外無表熱內熱不盛宜用芍藥湯即黃芩黃
連枳實木香芍藥當歸檳榔甘草肉桂少許也小
便澁赤加滑石下利次數無度下墜痛甚入大黃
也

香連和胃湯

參連開噤湯

貼臍法

痢疾下後調氣血宜用香連和胃湯黃芩芍藥香連草

陳皮白朮縮砂當赤虛更加椿榆炒白虛參苓共炒薑
噤口參連石蓮子貼臍王瓜藤散良

註
痢疾攻後病勢大減宜調氣血用香連和胃湯即
黃芩芍藥木香黃連甘草陳皮白朮縮砂當歸也
赤痢下血多虛者當澁之加炒椿根白皮炒地榆
白痢日久氣虛者加人參茯苓炒乾薑以補之實
而噤口堪下者以大黃黃連湯下之不堪下者內
以人參黃連石蓮子煎湯徐徐服之下咽即好外

以貼臍王瓜藤散即王瓜藤莖葉經霜者燒灰香
油調納臍中即有效也

真人養藏湯

久痢寒熱烏梅治寒虛滑痢養藏湯參朮肉蔻歸訶桂
芍藥罌粟草木香

註久痢藏有寒熱不分者宜用烏梅丸調和之寒虛
滑脫者宜用養藏湯溫補之即人參白朮肉蔻當
歸訶子肉桂芍藥罌粟殼甘草木香也

香連平胃散

胃風湯

水穀調中益氣治濕痢香連平胃方虛濕風痢胃風治
桂粟八珍減地黃

註水穀痢者乃脾胃虛腐化不及宜調中益氣湯濕
痢宜木香黃連合平胃散方濕而虛者宜用胃風
湯即肉桂粟米八珍湯減地黃也

五色痢休息痢治法

五色休息皆傷藏澁蚤滯熱蘊於中補之不應蚘有力
日久仍攻餘法同

註

五色休息二利皆因用止澁藥蚤或因滯熱下之
未盡蘊於腸胃傷藏氣也用一切補養之藥不應
則可知初病非止澁太蚤即下之未盡也診其蚘
若有力雖日久仍當攻也其餘治法與諸痢同

疸證總括

面目身黃欲安卧小便渾黃疸病成已食如饑飽煩眩
胃疸穀疸酒疸名女勞額黑少腹急小便自利審癥生
黃汗微腫皆濕熱陰黃重痛厥如水

註

面目身黃但欲安卧小便黃渾此黃疸病已成也
如已食如饑食難用飽飽則心煩頭眩此欲作胃
疸胃疸者即穀疸也若已見黃色疸已成矣得之
於胃有濕熱大饑過食也酒疸者得之於飲酒無

度而發是病也女勞疸者疸而額黑少腹急小便
自利得之於大勞大熱與女交接也瘀血發黃亦
少腹急小便自利但不額黑耳詳在傷寒門黃汗
者汗出黃色染衣面目微腫得之於素有濕熱汗
出入水浴之也此皆濕熱而成惟陰黃則屬濕寒
陰黃者身重而痛厥冷如水詳在傷寒門

疸病死證

疸過十日而反劇色若烟薰目暗青喘滿渴煩如啖蒜

面黧汗冷及天行

註

仲景曰黃疸之病當以十八日爲期治之十日以上宜差反劇爲難治也色若烟熏目神暗青陽黃死證也喘滿渴煩不已心胸如啖蒜刺痛黃毒入腹死證也面色黧黑冷汗漿漿陰黃死證也天行疫癘發黃名曰瘟黃死人最暴也

麻黃茵陳醇酒湯

茵陳蒿湯

梔子蘗皮湯

茵陳五苓散

表實麻黃茵陳酒裏實茵陳梔子大黃無證茵陳梔子蘗
尿少茵陳五苓湯

註 諸疸表實無汗者以麻黃茵陳無灰好酒煎服汗
之裏實不便以茵陳梔子大黃下之無表裏證以
茵陳梔子蘗皮清之小便短少以茵陳五苓散利
之

胃疸湯

穀疸熱實宜乎下不實宜用胃疸湯茵陳胃苓減草朴
連梔防已葛秦方

註胃疸湯即茵陳蒼朮陳皮白朮茯苓豬苓澤瀉黃

連梔子防已葛根秦朮也

茵陳解醒湯

梔子大黃湯

蔓菁散

加味玉屏風散

酒疸虛茵解醒湯實用梔豉枳大黃黃汗一味蔓菁散
石膏茵陳耆朮防

註酒疸虛者用茵陳解醒湯即葛花解醒湯加茵陳
也實者用梔子大黃湯即梔子淡豆豉枳實大黃
也黃汗宜用蔓菁子一味爲細末每服二錢日三
并華水調服小便白則愈或用加味玉屏風散即
石膏茵陳黃耆白朮防風也

石膏散

腎疽湯

女勞實者膏滑麥女勞虛者腎疽醫升陽散火減去芍
加苓藥麩四苓俱

註

石膏散即煨石膏飛滑石各等分每服二錢大麥
湯調服腎疽湯即升陽散火湯減去芍藥乃升麻
蒼朮防風獨活柴胡羌活葛根人參甘草加入黃
芩黃蘗神麩白朮茯苓豬苓澤瀉也

積聚總括

五積六聚本難經七癥八瘕載千金腸覃石瘕辨月事
瘕癖之名別淺深藏積發時有常處府聚忽散無本根
癥類積瘕聚癖腸滿汁溢外寒因

註
五積六聚之名本乎難經五積者肥氣伏梁痞氣
息賁奔豚也六聚者積之着於經絡緩筋募原脅
筋腸後輸脈也七癥八瘕之名載千金方七癥者
蛟蛇鱉肉髮虱米也八瘕者青黃燥血脂狐蛇鱉

也腸覃者積在腸外狀如懷子月事以時而下石
瘕者積在胞中狀如懷子月事不以時下故曰辨
月事也瘕者外結募原肌肉之間癖者內結隱僻
脅脊腸胃之後故曰別淺深也然積者屬藏陰也
故發有常處不離其部聚者屬府陽也故發無根
本忽聚忽散癥不移而可見故類積類瘕也瘕能
移有時隱故類聚類癖也積聚癥瘕腸覃石瘕瘕
癖之疾皆得之於喜怒不節則傷藏飲食過飽則

傷府腸胃填滿汁液外溢爲外寒所襲與內氣血
食物凝結相成也

積聚難證

積聚牢堅不軟動胃弱澹瀉不堪攻奔豚發作狀欲死
氣上衝喉神怖驚

註積聚牢固不動堅硬不軟則病深矣胃弱食少大
便澹瀉不堪攻矣五積之中奔豚最爲難治若更
發作正氣虛不能支其狀欲死從少腹起氣上衝

喉神色驚怖皆惡候也

積聚治法

積聚胃強攻可用攻虛兼補正邪安氣食積癖宜化滯
溫白桃仁控涎丹

註 積聚宜攻然胃強能食始可用攻若攻虛人須兼
補藥或一攻三補或五補一攻攻邪而不傷正養
正而不助邪則邪正相安也凡攻氣食積癖宜用
秘方化滯丸方在內傷門攻積聚癥瘕宜用溫白

九即萬病紫苑丸方倍川烏攻血積血瘕宜用桃
仁煎即桃仁大黃各一兩蝨蟲炒五錢朴消一兩
共爲末先以醇醋一觔用砂器慢火煎至多半鍾
下末藥攪良久爲小丸前一日不喫晚飯五更初
溫酒送下一錢取下惡物如豆汁鷄肝未下次日
再服見鮮血止藥如無蝨蟲以麤蟲代之然不如
蝨蟲爲愈也攻痰積宜用控涎丹方在痰飲門

疝證總括

經云任脈結七疝子和七疝主於肝肝經過腹環陰器
任脈循腹裏之原疝證少腹引陰痛衝上衝心二便難
厥吐瘕癥狐出入潰膿癢秘木癩頑

註
經曰任脈爲病男子內結七疝女子帶下瘕聚瘕
聚者即女子之疝也七疝主任者原以任脈起中
極循腹裏也七疝主肝者蓋以肝經過腹裏環陰
器也是以諸疝病無不由是二經故主之也疝病

之證少腹痛引陰九氣上衝心不得二便者爲衝
疝也少腹痛引陰九肝之逆氣衝胃作吐者爲厥
疝也少腹之氣不伸左右癥塊作痛者爲癥疝也
卧則入腹立則出腹入囊似狐之晝則出穴而溺
夜則入穴而不溺者爲狐疝也少腹痛引陰九橫
骨兩端約文中狀如黃瓜內有膿血者爲癰疝也
少腹痛引陰九小便不通者爲癰疝也少腹不痛
陰囊腫大頑硬者爲癰疝也

疝證同名異辨

血疝便毒潰魚口癩癩氣墜筋即疔水疝胞痺皆癰疝
衝似小腸腰痛連

註有謂血疝者其證即便毒魚口也癩疝者其證即
癩疝也氣疝者即偏墜也筋疝者即下疔也水疝
小便不通胞痺即膀胱氣皆癰疝也衝疝證似小
腸氣而更連腰痛也

諸疝治法

治疝左右分氣血尤別虛濕熱與寒寒收引痛熱多縱
濕腫重墜虛輕然

註
疝病凡在左邊陰丸屬血分凡在右邊陰丸屬氣
分凡寒則收引而痛甚熱則縱而痛微凡濕則腫
而重墜而虛亦腫墜但輕輕然而不重也

當歸溫疝湯

烏桂湯

中寒冷疝歸芍附桂索苧棟澤萸苓外寒入腹川烏蜜

肉桂芍草棗薑同

註 當歸溫疝湯即當歸白芍附子肉桂延胡索小茴
香川棟子澤瀉吳茱萸白茯苓也烏桂湯即川烏
蜂蜜肉桂白芍藥炙甘草生薑大棗也

烏頭梔子湯

外寒內熱烏梔炒水酒加鹽疝痛安癩疝不問新與久
三層茴香自可痊

註 此茴香丸方在醫宗必讀

十味蒼藥散

醇酒厚味濕熱疝不謹房勞受外寒蒼藥香附青益草
苗索查桃附子煎

註此散即蒼朮黃藥香附青皮益智甘草小茴香南
山查元胡索桃仁附子也

茴棟五苓散

大黃皂刺湯

膀胱水疝尿不利五苓茴棟與葱鹽煎鞭血疝宜乎下

大黃皂刺酒來煎

註大黃皂刺湯即大黃皂刺各三錢酒煎服也

羊肉湯

血分寒疝女產後臍腹連陰脹痛疼羊肉一觔薑五兩
當歸三兩水八升

奪命湯

衝疝厥疝痛上攻臍悸奔豚氣上行吳茱一味爲君主
肉桂澤瀉白茯苓

青木香丸

氣疝諸疝走注痛青木香附吳萸良巴豆拌炒川棟肉
烏藥萆澄小茴香

註

青木香丸即青木香五錢酒醋浸炒吳茱萸一兩
香附醋炒一兩萆澄茄五錢烏藥五錢小茴香五
錢巴豆仁二十一粒研碎拌炒川棟肉五錢爲末
合均葱涎爲小丸每服三錢酒鹽任下立愈及能
醫一切疝痛神效

茴香棟實丸

棟實狐疝一切疝棟肉茴香馬蘭芫三萸二皮各一兩
仍宜急灸大敦安

註 茴香棟實丸治狐疝及一切諸疝即川棟肉小茴

香馬蘭花芫花醋炒變焦色山茱萸吳茱萸食茱萸
萸青皮陳皮各一兩爲末醋糊爲小丸酒送二錢

按 大敦肝經穴在足大指甲後有毛處諸疝均宜灸
之即安



御纂醫宗金鑑卷四十二

欽定四庫全書

子部

御纂醫宗金鑑卷四十三

詳校官太醫院醫士臣程泰

編修臣倉聖脈覆勘

總校官中書臣朱鈐

校對官監丞臣張曾炳

謄錄舉人臣史殿榮

欽定四庫全書

御纂醫宗金鑑卷四十三

編輯雜病心法要訣目錄

頭痛眩暈

眼目

牙齒口舌

咽喉

肩背痛

心腹諸痛

胸脇痛

腰痛

小便閉癃遺尿不禁

大便燥結

御纂醫宗金鑑卷四十三目錄

欽定四庫全書

御纂醫宗金鑑卷四十三

編輯雜病心法要訣

頭痛眩暈總括

頭痛痰熱風濕氣或兼氣血虛而疼在右屬氣多痰熱
左屬血少更屬風因風眩暈頭痛熱暈煩渴火上攻
氣鬱不伸痰嘔吐濕則重痛虛動增

註
頭痛屬痰屬熱屬風屬濕屬氣或兼氣虛血虛因

風而痛謂之頭風必眩暈因熱而痛暈者則煩渴
因氣鬱而痛暈者則志意不伸因痰而痛暈者則
嘔吐痰涎因濕而痛暈者則頭重不起因虛而痛
暈者動則更痛更暈也

頭痛眩暈死證

真頭腦痛朝夕死手足厥逆至節青瀉多眩暈時時冒
頭卒大痛目瞽凶

註真頭痛痛連腦內手足青冷至肘膝之節朝發夕

死凡頭痛眩暈時時迷冒及頭目卒然大痛目視
不見或瀉多之後皆凶證也

萆菝散

芎芷石膏湯

頭痛嗜鼻熱萆菝濕盛瓜蒂入茶茗風盛日久三聖散
內服芎芷石膏靈芎芷石膏菊羌藎苦加細辛風防荆
熱加梔翹苓薄荷草便秘尿紅消黃攻

註一切頭風兼熱者以萆菝散嗜鼻即萆菝一味為

末用豬膽汁拌過噉之作嚏立愈一切頭風兼濕者以瓜蒂松蘿茶二味為末噉之出黃水立愈頭風風盛時發日久不愈則多令人目昏以三聖散噉之方在中風門內用芎芷石膏湯即芎芷石膏菊花羌活藁本也苦痛者加細辛風盛目昏加防風荆芥穗熱盛加梔子連翹黃芩薄荷甘草大便秘小便赤加消黃攻之自愈也

茶調散

清震湯

滾痰丸

人參芎附湯

風熱便利茶調散雷頭荷葉蒼與升痰熱滾痰芎作引
虛寒真痛附參芎

註雷頭風痛頭面疙瘩耳聞雷聲宜清震湯即荷葉
蒼朮升麻也人參芎附湯即人參川芎川附也

芎犀丸

偏正頭風芎犀丸血虛四物薄羌天氣虛補中加芎細
氣逆降氣黑鉛丹

註 血虛面少血色或久脫血也天天麻也降氣蘇子
降氣湯也

芎麻湯

半夏白朮天麻湯

欲吐暈重風痰痛芎麻湯下白丸寧虛者六君者乾藥
天麻麩蘖澤蒼同

註麻天麻也白丸青州白丸子也虛者謂風痰兼氣
虛者宜半夏白朮天麻湯即六君子加黃耆乾薑
黃蘗天麻神麩麥蘗澤瀉蒼朮也

荆穗四物湯

頭暈頭痛同一治血虛物穗氣補中氣血兩虛十全補
上盛下虛黑錫靈

註頭暈之虛實寒熱諸證同乎頭痛一治法也其有
因血虛宜用荆穗四物湯即當歸川芎白芍熟地

黃荊芥穗也氣虛宜用補中益氣湯氣血兩虛宜
用十全大補湯上盛下虛宜用黑錫丹

眼目總括

目為五藏六府精氣白筋黑骨精瞳血為眚絡肉約束
裹擷系屬腦項中經熱膝開因風入合邪上攻赤腫疼
輕者外障生雲翳重者積熱頓傷睛

註
經曰五藏六府之精氣皆上注於目而為之精精
之窠為眼氣之精為白眼筋之精為黑眼骨之精
為瞳子血之精為絡眚肉之精為約束即眼胞也
裹擷筋骨血氣之精而與脈系上屬於腦後出於

項中因經熱蒸開腠理故風邪得以入之風熱之邪合上攻於目赤腫疼痛輕者則為外障或暴生雲翳重者則積熱之甚陡然痛傷睛也

外障病證

火眼赤腫淚澁痛鞭腫多熱軟多風瞼粟爛弦鷄蚬肉
努肉赤脈貫瞳睛血灌瞳人高突起旋螺尖起蠅睛疼
拳毛風淚風痒極赤膜下垂黃膜衝

註
風熱上攻目赤腫痛多淚隱澁難開火眼也腫而

硬者屬熱盛也宜先下之腫而軟者屬風盛也宜先發散兩臉上下初生如粟漸大如米或赤或白不甚疼痛謂之臉生風粟兩臉粘睛赤爛痒痛經年不愈謂之爛弦風又名赤瞎臉內如鷄冠蚬肉翻出視物阻礙痛楚羞明謂之鷄冠蚬肉此皆脾經風熱為病也兩眦筋膜努出謂之努肉攀睛兩眦赤脈漸漸侵睛謂之赤脈貫睛兩眼混赤如朱痛如鍼刺謂之血灌瞳人兩眼痒痛忽然突起謂

之突起睛高目中大痛忽生翳膜狀如旋螺謂之
旋螺尖起目中大痛忽然瞳睛努如蟹目謂之蟹
睛疼痛又名損翳此皆肝心二經積熱也兩臉燥
急睫毛倒刺謂之倒睫拳毛兩目衝風淚出涓涓
冬月尤甚謂之迎風流淚兩目連眥痒極不痛謂
之風痒難任目中從下忽生黃膜侵睛疼痛謂之
黃膜上衝目中從上忽生赤膜垂下遮睛謂之赤
膜下垂又名垂簾翳此皆心肝脾三經風熱為病

也

內障病證

內障頭風五風變珠白黃綠不光明頭風痛引目無淚
相注如坐暗室中綠風頭旋連鼻痛兩角相牽引目疼
時或白花紅花起同綠黑花為黑風烏花不旋漸昏暗
黃風雀目久金睛青風微旋不痒痛青花轉轉目昏蒙

註內障之病每因頭風五風變成初病瞳珠漸漸變
色睛裏隱隱似翳或白或黃或綠雖與不患之眼

相似然無精彩光明射人病頭風者發則頭痛引
目無淚或左目或右目或先左目或先右目相注
不定如坐暗室之中此頭風傷目之漸也綠風者
頭旋兩角連鼻相牽引目疼痛時或見起白花紅
花此綠風傷目之漸也黑風者證同綠風時時見
起黑花此黑風傷目之漸也烏風者亦同黑風但
不旋暈而見烏花漸漸昏暗此烏風傷目之漸也
黃風者久病雀目瞳睛金色此黃風傷目之漸也

青風者頭微旋不痒不痛但見青花轉轉日漸昏
蒙此青風傷目之漸也

菊花通聖散

洗刀散

暴發火眼通聖菊外障等證減加方風盛羌加防麻倍
熱盛加連倍消黃痛生翳膜多傷目洗刀更入細獨羌
元參木賊白蒺藜草決蟬蛻蔓青箱

註 菊花通聖散即防風通聖散加菊花也洗刀散即

本方更加細辛羌獨蔓荆青箱子等藥也

內外障治

外障無寒一句了五輪變赤火因生內障有虛心腎弱故如不病損光明火能外鑑水內照養神壯水自收功五風內變諸翳障眼科自有法能攻

註

外障目病子和曰目不因火不病所以五輪變赤氣輪白睛火乘肺也肉輪目胞火乘脾也風輪黑睛火乘肝也木輪瞳人火乘腎也血輪兩眦火自

甚也故能治火者一旬便了也治火之法在藥則
鍼寒吐之下之在鍼則神庭上星顙會前項百會
刺之翳者可使立退痛者可使立已昧者可使立
明腫者可使立消矣內障目病雖亦無寒然有虛
也虛或兼熱亦屬虛熱故不赤腫疼痛如不病眼
人但不精彩光明也心虛則神不足神者火也火
內暗而外明故不能外鑑而失其光明也腎虛則
精不足精者水也水外暗而內明故不能內照而

失其光明也心虛者則養心神腎虛者則壯腎水
自可收功於不明也其五風內變諸翳如圓翳水
翳清翳澁翳散翳橫翳浮翳沉翳偃月棗花黃心
黑風等翳俱列在眼科方書自有治法難以盡述
此特其大槩耳

牙齒口舌總括

牙者骨餘屬乎腎牙齦手足兩陽明齒長豁動為腎僊
牙疼胃火風寒蟲不怕冷熱為風痛火腫喜冷得寒疼
寒不腫蛀喜熱飲蟲牙蝕盡一牙生

註

牙齒者骨之餘屬乎腎也若無故齒長疎豁而動
則為腎衰僊也上牙齦屬足陽明下牙齦屬手陽
明牙痛皆牙齦作痛惟寒牙痛則為客寒犯腦多
頭連齒痛為寒邪也故喜熱飲不腫不蛀也餘者

皆為胃火邪風濕熱也火牙疼多腫喜得冷得寒則更疼者讐仇之意也蟲牙則一牙作痛蝕盡一牙又蝕一牙作痛也

骨槽風 牙疳瘡

骨槽齧頰腫硬疼牙齧腐爛出血膿牙疳腫硬潰血臭皆因痘疹癖疾成

註骨槽風者牙齧連頰硬腫疼痛牙齧腐爛出血膿也牙疳以骨槽潰後腫硬不消然出臭

血而不出膿水也且皆痘疹癩疾之後而成也

清胃散

清胃血分火牙痛生地歸連升牡饒氣分宜加荆防細積熱涼膈入升膏

註胃火牙痛赤腫出血者則為血分宜用清胃散即

生地當歸黃連升麻牡丹皮也饒者倍加升麻丹皮也若腫痛牙齦不出血者則為氣分宜加荆芥

防風細辛以散其熱若腸胃積熱腫痛爛臭宜用
涼膈散加升麻石膏以下其熱可也

溫風散

溫風風牙歸芎細萆菴藜露蜂房寒牙痛加羌麻附
半服含漱吐涎良

註不甚腫痛不怕冷熱為風牙痛宜用溫風散即當
歸川芎細辛萆菴藜本白芷露蜂房也不腫痛甚
喜飲熱湯為寒牙痛宜本方再加羌活麻黃川附

子溫而散之二方俱服一半含漱一半連涎吐之
自好也

一笑丸

玉池散

薰藥

諸牙椒巴飯丸咬玉池藁芷骨槐辛歸芎大豆升防草
虫蝨牙葱韭子烟薰

註 諸牙謂諸牙痛也均宜一笑丸即川椒七粒為末

巴豆一粒去皮研勻飯為丸綿裹咬痛處吐涎即
止均宜用玉池散即藁本白芷地骨皮槐花細辛
當歸川芎黑豆升麻防風甘草煎湯熱漱冷吐蟲
牙亦宜此咬漱更須用韭子或葱子置小爐中燒
之攪在大水碗內覆以漏斗口向蟲牙痛處薰之
其蟲極小皆落水碗之中累效

蕪荑消疔湯

牙疔雖有專科治然皆未曉累攻神能食便軟猶當下

雄黃黃薈二連苓

註牙疳一病殺人最速雖有專科然皆未曉累攻之

法累攻者今日攻之明日又攻之以腫硬消黑色
變臭氣止為度若不能食或隔一日或隔二三日
攻之攻之後漸能食不必戒口任其所食雖大便
溏仍量其輕重攻之自見其神若竟不思食難任
攻下則死證也攻藥用蕪蕪消疳湯即雄黃蕪蕪
生大黃蘆薈川黃連胡黃連黃苓也

口舌證治

脣口屬脾舌屬心口舌瘡糜蘊熱深口淡脾和臭胃熱
五味內溢五熱淫木舌重舌舌腫大脣腫脣瘡緊繭脣
暴發赤痛多實熱淡白時痛每虛因

註
口舌生瘡糜爛名曰口糜乃心脾二經蘊熱深也
平人口淡故曰脾和口出氣臭則為胃熱不因食
五味而口內溢酸味者乃肝熱淫脾也苦味者心
熱淫脾也甘味者本經熱自淫也辛味者肺熱淫

脾也鹹味者腎熱淫脾也木舌謂舌腫硬不痛也
重舌謂舌下腫似舌也舌腫謂舌腫大也脣腫謂
脣腫痛厚也脣瘡謂脣腫潰裂成瘡也緊繭脣謂
脣緊小燥裂也以上之證皆屬心脾胃經蘊熱若
暴發赤腫痛甚多為實熱宜以涼膈散梔子金花
湯急下其熱可即愈也若日久色淡瘡白時痛不
痛每屬虛熱宜清心蓮子飲知藥四物湯補中煎
清可也或服涼藥久不愈者以七味地黃湯冷服

引火歸原不效甚者加附子可立愈也

咽喉總括

胸膈風熱咽喉痛邪盛單雙乳蛾生熱極腫閉名喉痺
語言難出息不通痰盛涎繞喉間響內外腫閉纏喉風
喉痺纏喉皆危證潰後無膿腫閉凶

註
胸膈上有風熱則咽喉腫痛風熱之邪若盛則生
單雙乳蛾在會厭兩傍高腫似乳蛾故名也熱極
則腫閉湯水不下言語難出呼吸不通名曰喉痺
若熱極更兼痰盛則痰涎繞於喉間聲響咽喉內

外腫閉湯水不下名曰纏喉風皆危病也或服藥
或吹藥或鍼刺潰破出膿血則愈若潰後不出膿
血仍然腫閉湯水不下則死矣

如意勝金錠

雄黃解毒丸

咽痛消毒涼膈散單雙乳蛾刺血痊喉痺纏喉勝金錠
急攻痰熱解毒丸昏噤牙關湯不下從鼻吹灌度喉關
吐下之後隨證治潰爛珍珠散上安

註
咽喉初起腫痛宜用消毒涼膈散即防風荆芥牛
蒡子梔子連翹薄荷黃芩甘草大黃芒消也單雙
乳蛾則刺少商出血在左刺左在右刺右在左右
刺左右也喉痺纏喉初起病勢未甚或狀如傷寒
宜服如意勝金錠即硫黃川芎臘茶火消薄荷生
川烏生地黃各等分為末葱自然汁合為錠重一
錢薄荷湯磨化服甚者連進三次若痰涎壅盛喉
間內外腫閉湯水難下病勢危急宜用雄黃解毒

丸即雄黃水飛鬱金細末各二錢半巴豆仁肥白者十四粒微去油以成散為度合均醋糊為丸如菘豆茶清下七丸便利吐痰則愈若昏冒牙關噤急湯不能下將藥用醋化開十九丸按中風門之法嚙入鼻內吐下則愈其後隨證調治可也若雖愈咽喉潰爛以珍珠散上之即好

吹喉七寶散

咽喉諸證七寶散消皂螫雄礪二礬細研如塵取一字

吹中患處效如神

註
咽喉諸證謂咽喉腫痛單雙乳蛾喉痹纏喉也七
寶散即火消牙皂全蠶雄黃硼砂白礬膽礬也

肩背總括

通氣防風湯

通氣太陽肩背痛羌獨藁草蔓防芎氣滯加木陳香附
氣虛升柴參耆同血虛當歸白芍藥血瘀薑黃五靈紅
風加靈仙濕二朮研送白丸治痰凝

註

李杲羌活勝濕湯又名通氣防風湯治太陽經風
濕肩背痛即羌活獨活藁本甘草蔓荊子防風川
芎也兼氣鬱滯痛者則常常作痛加木香陳皮香

附也氣虛鬱痛者則時止時痛加升麻柴胡人參
黃耆也血虛鬱痛者則夜甚時止加當歸白芍藥
也血瘀鬱痛者則夜痛不止加薑黃五靈脂紅花
也風氣鬱盛者痛則項肩強加威靈仙也濕氣鬱
甚者痛則肩背重加蒼朮白朮也痰風凝鬱者痛
則嘔眩用本湯研送青州白丸子也

心腹諸痛總括

心痛歧骨陷處痛橫滿上胸下胃腕當臍脾腹連腰腎
少腹小大腸脇肝蟲痛時止吐清水症即中惡寒外干
悸分停飲與思慮食即停食冷內寒水停痰飲熱胃火
氣即氣滯血瘀緣隨證分門檢方治真心黑厥至節難
註歧骨陷處痛名心痛橫滿連胸名肺心痛下連胃
腕名胃心痛連臍名脾心痛連腰名腎心痛連少
腹名大腸小腸痛連脇名肝心痛時止吐清水名

蟲心痛中惡腹痛名疰痛寒邪外干名中寒痛悸而痛名悸心痛水停心下屬飲也思慮傷心屬傷也停食痛停水痛停痰痛胃火痛氣滯痛血瘀痛皆不死之證也當分門施治惟真心痛面色黑四肢逆冷至節死證也

化滯丸

清中湯

攻濕積熱求化滯攻寒積水備急丹火痛二陳梔連菖

蟲用烏梅飲控涎

註化滯丸成方也清中湯即陳皮半夏茯苓甘草薑炒山梔黃連草豆蔻也

木香流氣飲

七情鬱結流氣飲思慮悸痛歸脾湯內寒理中外五積疰痛備急血抵當

小建中湯

木來乘土腹急痛緩肝和脾小建中血虛寒痛羊肉治

氣虛理中加陳青

註 羊肉謂羊肉湯也

烏頭梔子湯

刮諸鬱痛烏梔子刮而復痛入元明已經吐下或虛久
急痛欲死求鴉鳴

註 諸鬱謂諸寒火鬱而痛也寒多炮川烏為主熱多
薑炒梔子為主元明元明粉也鴉鳴謂以真鴉片
末或加麝香少許飯丸如桐子大每服三五丸引

在本草名一粒金丹

欽定四庫全書

御製皇清詩林
卷四十三

胸脇總括

栝蒌薤白白酒湯

栝蒌薤白半夏湯

栝蒌薤白白酒湯胸痹胸背痛難當喘息短氣時咳唾
難卧仍加半夏良

註栝蒌薤白白酒湯即栝蒌實小根菜水白酒煎也

顛倒木金散

胸痛氣血熱飲痰顛倒木金血氣安飲熱大陷小陷治

頑痰須用控涎丹

註

胸痛之證須分屬氣屬血屬熱飲屬老痰顛倒木
金散即木香鬱金也屬氣鬱痛者以倍木香君之
屬血鬱痛者以倍鬱金君之為末每服二錢老酒
調下虛者加人參更效胸中有痰飲熱作痛者輕
者小陷胸湯重者大陷胸湯丸治之若吐唾稠黏
痰盛則用控涎丹

枳芎散

枳橘散

柴胡疎肝湯

加味逍遙散

左金丸

當歸龍薈丸

脇痛左屬瘀留血輕金芎枳草重攻右屬痰氣重逐飲
片薑橘枳草醫輕肝實太息難轉側肝虛作痛引肩胸
實用疎肝柴芍草香附枳陳與川芎肝虛逍遙加芎細

陳皮生薑緩其中肝虛左金實龍薈一條扛起積食攻

註

左屬瘀血輕謂瘀血輕者宜用枳芎散重攻謂瘀
血重者宜以攻血之劑也枳芎散即枳殼撫芎鬱
金甘草也右屬痰氣重逐飲謂以控涎十棗逐痛
之重者也枳橘散即枳殼橘皮片子薑黃甘草醫
痛之輕者也柴胡疎肝散即柴胡白芍甘草香附
枳殼陳皮川芎也逍遙散即白朮茯苓當歸白芍
柴胡炙草薄荷少許加川芎細辛陳皮生薑也左

金即左金丸吳茱萸黃連也肝實火旺者當歸龍
蒼丸積食者以化滯丸積飲者以控涎丹

腰痛總括

腰痛腎虛風寒濕痰飲氣滯與血瘀濕熱閃挫凡九種
面忽紅黑定難醫

註腰痛之證其因不同有腎虛有風有寒有濕有痰
飲有氣滯有血瘀有濕熱有閃挫凡患腰痛極甚
而面色忽紅忽黑是為心腎交爭難治之證也

安腎丸

腰痛悠悠虛不舉寄生青娥安腎丸胡盧骨脂川棟續

桃杏苧苓山藥鹽

註 寄生謂獨活寄生湯青娥丸即補骨脂杜仲核桃

仁也安腎丸即胡盧巴補骨脂川棟肉川續斷桃
仁杏仁小苧香茯苓山藥也鹽鹽湯為引也

羌活勝濕湯

通經丸

腰痛屬寒得熱減五積吳萸桃杜安寒濕重著勝濕附
內實通經疏麵牽風痛無常掣引足經虛當用寄生痊

經實非汗不能解續命湯加牛杜穿

註 五積散加吳茱萸桃仁杜仲羌活勝濕湯即防風
通氣湯加附子也通經丸即硫黃黑牽牛頭末麥
麩合丸煮浮起服方出本草小續命湯加牛膝杜
仲炒穿山甲也

通氣散

活絡丹

氣滯閃挫通氣散木陳穿索草茴牽血瘀不移如錐刺

日輕夜重活絡丹

註通氣散即木香陳皮穿山甲元胡索甘草小茴香

白牽牛也活絡丹即川烏草烏南星地龍乳香沒藥也加五靈脂麝香丸效

蒼藥散

煨腎散

濕熱熱注足蒼藥二妙牛杜已瓜芎腰如物覆濕痰畜煨腎椒鹽遂有功

註
蒼藥散即蒼朮黃藥牛膝杜仲防己木瓜川芎也
煨腎散即猪腰子剖開入川椒食鹽甘遂末濕紙
裏煨熟酒食之

小便閉癃遺尿不禁總括

膀胱熱結為癃閉寒虛遺尿與不禁閉即尿閉無滴出少腹脹滿痛難伸癃即淋瀝點滴出莖中澁痛數而勤不知為遺知不禁石血膏勞氣淋分

註膀胱熱結輕者為癃重者為閉膀胱寒虛輕者為遺尿重者為不禁閉者即小便閉無點滴下出故少腹滿脹痛也癃者即淋瀝點滴而出一日數十次或勤出無度故莖中澁痛也不知而尿出謂之

遺尿知而不能固謂之小便不禁

小便閉遺尿死證

嘔噦尿閉為關格若出頭汗命將傾傷寒狂冒遺尿死
尿閉細瀝不能生

註

上為嘔噦不入下為小便不通則陰陽之氣關格
若出頭汗則為陽絕故命傾也傷寒狂冒屬陽邪
盛遺尿屬陰不守若尿閉脈細澁知陰亦竭故俱
死也

治癰閉熨吐汗三法

陰陽熨臍葱白麝冷熱互熨尿自行宣上木通葱探吐
達外葱湯薰汗通

註

用葱白一觔細剉入麝香五分拌勻分二包置臍
上先以炭火熨斗熨之半炷香時換一包以冷水
熨斗熨之互相遞熨以尿通為度服諸藥不效或
服藥即時吐出或服攻下藥不利宜用宣上法以
木通老葱煎湯服頃時探吐再服再吐以尿通為

度服諸藥不效或身無汗宜用達外法以葱湯入木桶內令病人坐於杌上沒臍為度匝腰繫裙以覆之少時汗出其尿自出欲尿時不可出桶即於桶內溺之恐出桶氣收而尿又回也

小便不通

通關丸

熱實不化大便鞭癢閉八正木香痊陽虛不化多厥冷惡寒金匱腎氣丸陰虛不化發午熱不渴知藥桂通關

氣虛不化不急滿倦怠懶言春澤煎

註

小便不通熱實者宜用八正散加木香陽虛者宜用金匱腎氣丸陰虛者宜用通關丸即知母黃蘗肉桂少許也氣虛宜用春澤湯即五苓散加人參也

八正散

石淋猶如鱗結鑿是因濕熱煉膀胱一切熱淋八正扁通滑梔瞿草車黃

註 八正散即扁蓄木通瞿麥梔子滑石甘草車前子
大黃也

小薊飲子

血淋心遺熱小腸實熱仍宜下之良清熱小薊梔滑淡
歸藕通蒲草地黃

註 淡淡竹葉也藕藕節也蒲蒲黃也

海金沙散

鹿角霜丸

膏淋尿濁或如涕精溺俱出海草滑熱盛八正加蒼朮
虛用秋苓鹿角佳

註海海金沙也秋秋石也苓茯苓也鹿角鹿角霜糯
米糊為丸也

加味八正散

氣淋肺熱難清肅八正石葦木葵沉內傷氣虛不能化
五苓益氣自通神

註八正散加石葦木香冬葵子沉香五苓合補中益

氣湯

補中益氣湯合五苓散

清心蓮子飲

勞淋內傷補中苓腎氣知藥過淫成勞心清心蓮地骨
耆苓車麥草參苓

註內傷勞脾用補中益氣湯合五苓散勞腎陽虛用

金匱腎氣湯陰虛用知藥地黃湯思慮勞心用清
心蓮子飲是方即蓮子地骨皮黃耆黃苓車前子

麥門冬生甘草人參白茯苓也

琥珀散

痰淋七氣白丸子熱燥清熱用滋陰諸淋平劑琥珀木
葵蓄通滑歸鬱金

註 七氣湯見諸氣門青州白丸子見類中風門滋陰

通關丸也木木香也葵冬葵子也

桂附地黃丸

補中益氣湯加白果方

坎離既濟湯加山萸肉五味子方

遺尿不禁淋尿白桂附補中白果煎補之不應或尿赤
生地知藥萸味攢

註遺尿不禁及諸淋尿色白者皆屬寒虛寒者用桂

附地黃湯加白果虛者用補中益氣湯加白果凡

遺尿不禁諸淋尿色赤者或補之不應者亦有熱

虛用坎離既濟湯即生地知母黃藥加山萸肉五

味子也

大便秘結總括

熱燥陽結能食數寒燥陰結不食遲實燥食積熱結胃
食少先鞭後澹脾氣燥阻隔不降下血燥乾枯老病虛
風燥久患風家候直腸結鞭導之宜

註
熱燥即陽結也能食而脈浮數有力與三陽熱證
同見者也寒燥即陰結也不能食而脈沉遲有力
與三陰寒證同見者也實燥即胃實鞭燥也與腹
滿痛同見者也虛燥即脾虛先鞭後澹之燥也與

少氣腹縮同見者也氣燥即氣道阻隔之燥也與
噎膈反胃同見者也血燥即血液乾枯之燥也與
久病老虛同見者也風燥即久患風病之燥也從
風家治直腸結即燥屎巨鞭結在肛門難出之燥
也從導法治之

結燥治法

溫脾湯

握藥法

熱實脾約三承氣寒實備急共溫脾大黃薑附桂草朴
寒虛硫半握藥醫虛燥益氣消黃入血燥潤腸與更衣
氣燥四磨參利膈風燥搜風順氣宜


註

溫脾湯即大黃乾薑附子肉桂甘草厚朴也硫半
丸即硫黃半夏也握藥即巴豆仁乾薑韭子良薑
硫黃甘遂白檳榔各五分為末合均飲和分二粒
先以花椒湯洗手麻油塗手心握藥移時便瀉欲
止則以冷水洗手益氣即補中益氣湯加大黃朴

消潤腸丸即當歸生地枳殼桃仁火麻仁各等分
為末蜜丸米飲早服更衣丸即生蘆薈硃砂末等

分飯丸酒服四磨湯即人參烏藥沉香檳榔也參

利膈即人參利膈丸也搜風順氣即搜風順氣丸



御纂醫宗金鑑卷四十三